

Dia 20 awe:

ARUBA INDUSTRIAL GASES TA YEGA AWE NA 30 AÑA DI SERVICIO

ORANJESTAD (AAN) - Aruba Industrial Gases (AIG) ta yega awe na su 30 aña di establecimiento, dunando e mercado local un servicio excelente, a base di calidad y profesionalismo.

Manera ta conoci, AIG ta un empresa mas tanto suplidor di mayoria gas industrial, pero tambe ta productor di un di nan.

DIARIO a conversa cu señor Stanley Marchena, Director di e compania, relaciona cu e maneho di e compania importante aki.

"AIG a yega na su treinta aña di existencia. E compania a cuminsa como productor di cierto tipo di gasnan, manera oxigeno, nitrogeno (stikstof), y diferente otro producto cu nos ta trese for di Venezuela. Actualmente e parti di produccion local di e gasnan no tey mas (excepto un sorto), debi cu e costo di energia y diferente otro factor cu ta dicidi fuertemente riba e costo di produccion", señor Marchena a indica.

IMPORTACION: Sr. Marchena a sigui bisa cu for di entre 10 pa 8 aña pasa, A.I.G a dicidi pa importa gas

industrial, cu e meta di trese cierto beneficio pa por mantene cierto equilibrio den e prijsnan, loke a worde logra.

"Nos ta trahando hunto cu nos compania ruman na Venezuela, cual ta "Gases Industriales de Venezuela".

E compania aki ta distribui gas industrial tanto na Aruba como na Curacao.

Manera ta conoci nos no ta supli gas propano (domestico), cual no ta nos area, pero gas atmosferico, es decir, esun cu ta bin di aire", el a splica.

E unico producto of gas cu ta worde produci localmente ta Acetileno, ya cu e ta uno dificil pa transporta.

Sr. Marchena a splica cu e compania a yega di sufri cierto problema cu transporte di e productonan for di Venezuela, ora cu e Ferry's a keda for di servicio, pero afortunadamente e situacion ta completamente bao control, di manera cu por abastecer e mercado local sin a drenta den un fase di crisis.

CLIENTENAN: A.I.G ta conta cu clientenan grandi na Aruba manera Hospital, Coastal, y WEB.

Coastal ta cumpra varios producto for di AIG, y un di e mas critico ta Nitrogen, pero na e momentonan aki Coastal ta satisfecho cu e servicio cu e compania distribuidor ta duna nan.

Tin mas industria local cu ta worde supli cu gas door di AIG. Entre nan ta WEB, y otronan cu ta haci trabaonan di soldadura, y corte di metal.

MERCADO: Actualmente AIG tin un estabilidad basta grandi riba mercado. E compania tambe ta depende basicamente di proyectonan cu ta worde desaroya riba e isla.

Den pasado e compania tabata basta involvi den e fase di dismantelacion di e refineria, cual trabaonan tabata requeri di oxigeno, acetileno y otro gasnan industrial.

Despues a bin e proceso di reconstruccion di e refineria ora Coastal a establece na Aruba, loke tabata tin mester di otro sorto di gas tambe tanto pa soldadura como pa corta, ademas di diferente otro producto manera electrodo y articulonan di seguridad. For di e tempo cu e refineria a establece te actual-



mente AIG ta supli e como un empresa den "full operation", segun señor Marchena a splica.